

ԱՐՑԱԽԻ ԿՈՒՍԱՆԱՑ ԱՆԱՊԱՏՆԵՐԸ

ՀԵՂԻՆԷ ՄԿՐՏՁԵԱՆ (heghmk@yahoo.com)

ՄՈՒՏՔ

Հայ Եկեղեցու պատմության ընթացքում կանանց մենաստանները մեծ տարածում չեն գտել: Սակաւ են նաեւ կուսանոցների մասին պատմագրական ու մատենագրական տեղեկութիւնները: Այդուհանդերձ, յայտնի են մի շարք հայ կուսանաց վանքեր, որոնք պատմական տարբեր ժամանակներում՝ գործել են ինչպէս Հայաստանում, այնպէս էլ Հայաստանի սահմաններից դուրս: Առաւել յայտնի են կուսանոցների վերագարթօնքի դարաշրջան համարուող ԺԷ. դարի կուսանոցները, որոնցից նշանաւոր են յատկապէս Սիւնեաց Աշխարհի գրչութեան կենտրոն կուսանոցները:

Այս յօդուածում կ'անդրադառնաք Արցախի կուսանաց անապատներին, որոնք գործել են պատմական Արցախի տարբեր գաւառներում:

Հարկ է նշել, որ դարերի ընթացքում փոփոխուել են Արցախի սահմաններն ու վարչական բաժանումները: Մեր ուսումնասիրութեան մէջ ներկայացուող կուսանոցներն ընդգրկում են Արցախի պատմական գաւառներն այն աշխարհագրութեամբ, ինչպիսին այն նկարագրել է Մակար Եպիսկոպոս Բարխուդարեանցն իր յայտնի *Արցախ* աշխատութիւնում:

Բարխուդարեանցը հետեւեալ կերպ է գծագրում պատմական Արցախի սահմանները. «*Երասխ, Կուր, Խրամ եւ Ձորագետ (միացած) եւ Հակարի գետերի եւ Կայէնի, Դիլիջանի, Գեղամեան ամենաբարձր լեռների գագաթնագծի մէջ եղած տարածութիւնն*»²: Նա առանձնացնում է 23 գաւառ³,

¹ Մխիթարեան միաբան հայր Վարդան Հացունին առանձնացնում է Հայ Եկեղեցում կանանց վանքերի առաւել ծաղկուն երեք դարաշրջան՝ Դ. դարի երկրորդ կէսից մինչեւ Ե. դարը, ԺԲ. դարը, եւ՝ ԺԷ. դարը (Վ. Հացունի, «Կուսաստանք Հայաստանի մէջ», *Բազմավէպ*, 1923, Մարտ, էջ 77):

² Մակար Եպս. Բարխուդարեանց, *Արցախ*, տպ. «Արօր», Բագու, 1895, էջ 2: Ուշագրաւ են Ռուբէն Գալիչեանի հրապարակած Արցախի հին քարտէզները: Մասնաւորապէս՝ պատմական Արցախի նշուած տարածքն ընդգրկուած է Շիրակացու *Աշխարհացոյցի* հիման վրայ Վենետիկում 1751ին հրապարակուած Հայաստանի քարտէզում: ԺԸ. դարից սկսած արեւմտեան, ինչպէս նաեւ մահմեդական քարտէզներում Ղարաբաղ անուամբ է նշուած Արաքսի (Երասխի) հիւսիսային հատուածում՝ Սեւանայ լճի հարաւ-արեւելեան աագանից մինչեւ Կուր եւ Արաքս գետերի հատման տեղը (R. Galichian (Galchian), "Karabagh (Artsakh) in Old Maps," *Բանբեր հայագիւրութեան*, 2:2017, էջ 57-64. նաեւ՝ 3:2017, էջ 34-38:

³ Բարխուդարեանցը նշում է գաւառների պատմական անուանումները՝ ժամանակի կրած բոլոր փոփոխութիւններով, ինչպէս նաեւ դրանց՝ իր ժամանակի, հիմնականում թրքացած, անուանումները: Այդ գաւառներն են՝ Ա.- Պիանք (Ջաբրայէի), Բ.- Մուխանք (Մուղան, Միլին դաշտ), Գ.- Արանոտու եւ Դ.- Տոյ (յետագայում երկուսը միասին՝ Քեաքիրլու), Ե.- Ռոցպատեան եւ Զ.- Աղուէ (միաւոր-

որոնք տարածում են Արցախի Դաշտային (Ստո-րին), Լեռնային (Միջին) եւ Հարաւային (Վերին) աշխարհագրական հատ-ուածներում:



Մեր ձեռքի տակ չունենալով Արցախի պատմական գաւառների ամբողջական քարտեզը՝ օգտակար համարեցինք ներկայացնել Ալեքսան Յակոբեանի՝ ըստ *Աշխարհացոյցի* կազմած Մեծ Հայքի Արցախ եւ Ուտիք նահանգների քարտեզը, որտեղ անուանումների փոքր-ինչ տարբերութիւններով գծագրուած են Բարխուդարանցի նշած գաւառները:

ուած՝ Զաւանշիր), **Է.-** Տուչքատակ (Տիգրանակերտ, Շահ-բուլաղ), **Ը.-** Ուտի-առանձնակ (Ջուանշիր), **Թ.-** Շիկաշէն (Գանձակ, Գեանջա, Ելիսաւետպոլ), **Ժ.-** Կողք (Շամքոր, Զակամ), **ժԱ.-** Պազկանք (Դիզակ, Զաքրայէլ), **ժԲ.-** Միւս Հաբանդ (Հաբանդ-Ամարաս, Վարանդա), **ժԳ.-** Մեծիրանք (Մեծարանք, Խաչէն), **ժԴ.-** Ըստիսական (Ըոստակ, Հաթերք), **ժԵ.-** Մեծ-կողմանք (Մեծկուանք, Զարաբերդ, Թալիշ, Կիլստան, Զրաբերդ, Զուանշիր), **ժԶ.-** Գարդման (Գարդմանաց ձոր, Գարթմանիկ, Գանձակ), **ժԷ.-** Փառնէս (Փառիս, Փառիսոս, Շամշատին), **ժԸ.-** Քուստի (Քաւս, Ղազախ), **ժԹ.-** Զաւէ (Ձորագետ, Երկիր Սետրդեաց, Երկիր Կայէնոյ, Ղազախ), **Ի.-** Բերդաձոր (Բերդ-ձոր, Բելուկան, Ղալաղշլաղ, Զաքրայէլի), **ԻԱ.-** Հարճկանք (Զառիստ, Հաճիլար), **ԻԲ.-** Վակունիք (Վերին Վայկունիք), **ԻԳ.-** Միսական Ոստան (Ծար, Զար): **Բ.-Ժ.** գաւառներն երբեմն պատկանելիս են եղել Ուտի նահանգին (Բարխուդարեանց, էջ 21-26):

Արցախի կուսանոցների մասին կարելի է աղբյուրներ են ինչպես ձեռագիր յիշատակարաններն ու վիմագիր արձանագրությունները, այնպես էլ՝ տեղագրական ու ճամփորդական յուշագրությունները, ժողովրդական տարբեր ասանդագրոյցները:

Ուշագրաւ են Սարգիս արք. Զալալեանցի ու ազգագրագէտ Երուանդ Լալայեանի ԺԹ. դարի յուշագրությունները: Առաւել ուշագրաւ են Բարխուդարեանցի հաղորդումներն Արցախի պատմական գաւառների մասին, որում առաջին անգամ համապարփակ ներկայացուած են բազմաթիւ պատմական յուշարձաններ ու սրբավայրեր: Նոր ժամանակների երախտաւորներից են Շահէն Մկրտչեանն ու Սամուէլ Կարապետեանը:

Ժամանակագրական առումով Արցախի կուսանոցները թուագրում են հիմնականում ԺԷ. դարով: Սակայն յայտնի են նաեւ այլ դարաշրջանների կուսանոցներ:

Ստորեւ՝ Արցախի նշուած սահմաններում գործած կուսանոցները:

Աւետարանոցի Կուսանաց Անապատ

Արցախի կուսանաց անապատներից առաւել յայտնին Աւետարանոցի⁴ ԺԷ. դարի Կուսանաց Անապատն է պատմական Վարանդա⁵ գաւառում:

Կուսանոցը հիմնադրուել է 1616ին, որի մասին վկայում է մուտքի բարաւորին արուած արձանագրութիւնը. «Եկեղեցիս թվ. ՌԿԵ»⁶:

⁴ Ըստ ասանդագրոյցների՝ Աւետարանոցը հիմնել է Վաչագան Գ. բարեպաշտ թագաւորը: Աանդութիւնը Կուսանաց Անապատի հիմնադրութիւնը եւս այս արքային է վերագրում, իսկ կուսանոցի առաջին միանձնուիի համարում Վաչագան թագաւորի դստերը (Սարգիս արք. Զալալեանց, *Ճանապարհորդութիւն ի Մեծն Հայաստան, մաս Բ.*, տպ. Ներսիսեան հոգեւոր դպրոցի, Տիֆլիս, 1858, էջ 248. նաեւ՝ Երուանդ Լալայեան, «Վանադայ», *Ազգագրական հանդէս, գիրք Բ.*, 1897, Թիֆլիս, էջ 42. նաեւ՝ Է. Мелик-Шахназаров, «Древности селения Чанахчи», *Сборник материалов для описания местностей и племен Кавказа*, выпуск 19-й («Չանախչի բնակավայրի հնութիւնները», նիւթերի ժողովածու Կովկասի տեղանքի եւ ազգութիւնների մասին, 19րդ պրակ, հրատ. Կովկասի ուսումնական շրջանի վարչութեան), Թիֆլիս, 1894, էջ 81:

⁵ ԺԲ. գաւառն է Լեռնային կամ Միջին Արցախում, որ կոչուել է նաեւ Միւս Հաբանդ կամ Հաբանդ-Ամարաս: Գտնուում է Գարգար (Կարկառ) գետի վերին հոսանքի շրջանում (Բարխուտարեանց, էջ 23. նաեւ՝ Թ. Յակոբեան, Ստ. Մելիք Բախշեան, Յ. Բարսեղեան, *Հայաստանի եւ յարակից շրջանների տեղանունների բառարան, հրդր. 4*, ԵՊՀ հրատ., Երեւան, 1986, էջ 772):

⁶ Բարխուտարեանց, էջ 96. նաեւ՝ *Ազգագրական հանդէս*, էջ 42: Բարխուտարեանցը ներկայացնում է նաեւ այլ արձանագրութիւններ, որոնց մեծ մասը 1960ականներին Խորհրդային Հայաստանից Ադրբեջան գործուղուած հայ գիտարշաւի մասնակիցները տեղում չեն գտել (*Դիւան հայ վիմագրութեան. Արցախ, պրակ V*, Հայկական ՍՍՀ ԳԱ հրատ., Երեւան, 1982, էջ 150-51):

Ինչպես արդեն նշել ենք, ԺԷ. դարը Հայ Եկեղեցում կուսանոցների վերադարձնաճան շրջան էր, նշանաւոր՝ Սիւնիքի կուսանոց անապատներով ու իր գրչուհիներով: Լինելով նոյն դարաշրջանի ծնունդ՝ Աւետարանոցի կուսանոցը եւս, ինչպէս Սիւնիքի Շէնհէրի կուսանոցը, գրչութեան կենտրոն էր:

ԺԹ. դարի կէսերին Զալալեանցն Աւետարանոցում տեսել է կուսանոցի մայրապետերից Գայիանէ⁷ գրչուհու 1671ին ընդօրինակած Աւետարանը⁸, որի յիշատակարանը մեզ է փոխանցում կուսանոց անապատի հիմնադրի ու առաջին մայրապետի, ինչպէս նաեւ այլ երախտաւորների անուններ.

Արդ այսմ Աստուածեղէն եւ երկնապարգեւ գանձիս, եւ լուսափայլ մարգարտիս եղեւ ցանկացող եւ եռափափագ սիրով գծագրող եւ ստացող աստուածասէրք եւ բարեպաշտուհիք սրբասնունդք եւ կուսակրօնք հարազատքն գծող սուրբ Աւետարանիս մայրապետն **Գայիանէ** եւ անդրանիկն իւր **Հռիփսիմէ**, որ եղեւ սկիզբն շինութեան սուրբ կուսաստանին Ղարաբաղու, որ ի գիւղաքաղաքն Աւետարանոցին ընդ հովանեաւ սուրբ Նշանին եւ այլում սրբութեանց՝ որ են աստ: Արդ եւ նուաստս բնաւից եւ անարհեստս արուեստաւորաց բազմամեղ **Գայիանէ** ջերմեռանդ սիրով ծրեցի զսուրբ Աւետարանս թվին Հայոց ոճի յիշատակ հոգւոյ ծնողին իմոյ եւ մարմնաւոր հարազատին **Հռիփսիմէին** եւ հոգեւոր հօրն իմոյ բազմաշխատ տէր Առաքելին, որ քրտնաջան երկամբք աշխատեալ է ի վերայ Անապատիս ի մանկութենէ մինչեւ ի ծերութիւն եւ

⁷ Գայիանէի անձի հետ կապուած կայ մի թիրմբոնում, որ շրջանառում է նաեւ մեր օրերում: Ժողովրդական ասանդութեամբ Բաֆֆին նրան համարում է մելիք Հուսէյնի եւ նրա կողակից Աննա Խաթունի դուստրը, որն 1733ին աչքի է ընկել իր հերոսութեամբ՝ օսմանցի զօրախմբի դէմ պայքարում: Ինչպէս գրում է Բաֆֆին՝ սպանելով օսմանցի զօրապետին, Գայիանէն «*իր անձը նուիրեց կուսակրօնութեան եւ մտաւ Աւետարանոց գիւղի կուսանոց անապատը*»: Այս նոյն Գայիանէին էլ Բաֆֆին նոյնացնում է մեր յօդուածում նշուած 1671ի Աւետարանի Գայիանէ գրչուհու հետ: Այստեղ ժամանակագրական սխալ կայ այն պարզ պատճառով, որ Գայիանէ գրչուհու ձեռագրերը գրուել են անլի վաղ՝ ԺԷ. դարում (Բաֆֆի, էջ 48. նաեւ՝ Հրաչեայ Աճառեան, *Հայոց անձնանունների բառարան*, հղր. Ա., ԵՊՀ հրատ., Երեւան, 1942, էջ 445. նաեւ՝ *Դիւան. Արցախ*, էջ 147-48. նաեւ՝ Թամարա Մինասեան, *Արցախի գրչութեան կենտրոնները*, Նայիրի հրատ., Երեւան, 2015, էջ 48):

⁸ 1881ին Աւետարանոցում այս նոյն Աւետարանը տեսել է նաեւ Բաֆֆին: Անլի ուշ Աւետարանոց այցելած Լալայեանն Աւետարանն այլեւս չի գտել: Այսօր էլ Աւետարանի ճակատագիրն անյայտ է (Բաֆֆի, *Խամսայի Մելիքութիւնները*, տպ. Կովկասի Կառավարչ. Գլխ. Կառավ., Թիֆլիս, 1882, էջ 48. նաեւ՝ *Ազգագրական հանդէս*, էջ 42):

բազմերախտ Մարտիրոս Արիի եպիսկոպոսին եւ ծնողացն իմոց եւ այլ համայն ազգականաց իմոց՝ ամէն⁹:

Գայիանէ գրչուիումն է պատկանում նաեւ Ձեռաց Մաշտոցի¹⁰ մի ընդօրինակում, որ պահուում է Մեսրոպ Մաշտոցի անուան Մատենադարանում:

Կուսանցի գրչուիւններից է նաեւ Կատարինէ կոյսը, որի 1650ին ընդօրինակած Աւետարանը ծաղկել է նոյն Գայիանէ գրչուիւն:

Ուշագրաւ են ձեռագրի յիշատակարանում Կատարինէ գրչուիւն գրառումները: Նա խնդրում է յիշել *«զմայրագութ եւ սննդամայրն վարպետն իմ՝ զՄարիամ կուսանուիի, զոր սնոյց զիս եւ կարդացոյց բազում աշխատութեամբ եւ յեր իւրոյ աշխատութեանն եր գիս ի ձեռն տէր Աստուածատուր քահանային վասն շարականի եւ գիր ուսուցանելոյ, որ էր խոստովանահայր անապատին Շէնհերոս»*¹¹:

Դատելով այս յիշատակարանից՝ Կատարինէ կոյսը, որ իրեն «ղարիպ» է կոչում, գրչութեան արուեստ է սովորել Շէնհերի կուսանոցում, որտեղից էլ տեղափոխուել է Աւետարանոց. փաստ՝ որ վկայում է այս երկու կուսանոցների առնչութիւնների մասին:

Բարխուդարեանցի բերած մեկ այլ ձեռագիր յիշատակարանից կարելի է եզրակացնել նաեւ, որ կուսանցի միանձնուիւններ են եղել նաեւ Վարանդայի մելիքների դուստրերից: Թերեւս, նրանցից են, մելիք Բաղու կուսակրօն դուստրերը, որոնց անունները նշում են Աւետարանցի եկեղեցում պահուող Աւետարանի՝ 1737ին գրուած մի յիշատակարանում. *«Սուրբ աստուարան սրբագիր եւ ոսկեզօծ վախմ եւ յիշատակ է Աբրահամ պարոն-Տէրին, որ տվան Մէլիք Պաղուն կուսակրօն դստրեացն Հռութիմին եւ Դաւլաթին եւ Շահանդուխտին ձեռքն ի վայելումն... գրեցաւ մատարմբ տէր Եղիազարին մայիսի ԻԵ. օրն թվ. ՌՃՁԶ. էր...»*¹²:

Թէ ե՛րբ է Աւետարանցի Կուսանաց Անապատը դադարել գործելուց՝ յայտնի չէ: Կարելի է միայն ենթադրել, որ դա տեղի է ունեցել մինչ ԺԹ. դարը՝ ԺԸ. դարի վերջերին՝ 1797ին Իրանի շահ աղա Մուհամադ խանի Անդրկովկաս արշաւանքների ժամանակ¹³, երբ Վարանդայից Վրաստան է

⁹ Զալալեանց, էջ 246-47. նաեւ՝ Հեղինէ Մկրտչեան, «Հայկական ձեռագրերի յիշատակարանները կանանց մենաստանների եւ կուսակրօն կանանց վերաբերեալ», *էջմիածին*, Բ:2013, էջ 99:

¹⁰ *Մայր ցուցակ հայերէն ձեռագրաց, հպր. Ը.*, «Նայիրի» հրատ., Երեւան, 2013, էջ 17-24. նաեւ՝ Մինասեան, էջ 48-49:

¹¹ *Հայերեն ձեռագրերի ԺԷ. դարի յիշատակարաններ (1641-1660), հպր. 3*, Հայկ. ՍՍՀ ԳԱ հրատ., Երեւան, 1984, էջ 627. նաեւ՝ Մկրտչեան, էջ 98:

¹² Բարխուդարեանց, էջ 95:

¹³ Այս առիթով յիշատակելի է կուսանոցին վերաբերող մի ասանդագրոյց, ըստ որի 1797ին, շահի արշաւանքի ժամանակ կոյսերը, փախչելով պարսիկ զինուորներից, թաքստոց են գտնում անտառում: Կոյսերից մէկը, սակայն, յապաղելով զին-

փախել Մելիք-Շահնազարեանների տոհմից մելիք Զումշուղը: Նոյն շրջանում Արցախում սկսուած սովի ու ժանտախտի պատճառով Վրաստան է գաղթել նաեւ Վարանդայի բնակչութիւնը¹⁴:

Այսպէս թէ այնպէս՝ Ղարաբաղի *կոնսիստորիայի*¹⁵ կազմած 1825ի վանքերի ցանկում Աւետարանոցի կուսանոցն այլեւս անշէն է. «Անշէն անապատ Կուսանաց, կառուցեալ մերձ գեղջն Աւետարանոց Վարանդայ գաւառակի, եկեղեցին ամբողջ, տանիք գաւթին խախտեալ, յորում ամփոփեալ կան մարմինք ոմանց Մելիքաց ցեղին Մելիք-Շահնազարեանց, եւ այլոց հոգեւորականաց, սենեակքն բոլորովին կործանեալք»¹⁶:

Աւետարանոցի արդէն ամայացած կուսանոցի մասին է հաղորդում նաեւ Զալալեանցը ԺԹ. դարի կէսերին. «Մենաստան Կուսանաց անկանի ի հարաւային կողմն այսր գեղջ կառուցեալ ի ծայր ապառաժ վիմի սագաշէն եւ փոքրիկ, շուրջ զորով են հարկւրաւոր սենեակք միաբան Կուսանաց արդէն ամայի»¹⁷:

Երբեմնի նշանաւոր կուսանոցը ԺԹ. դարի վերջին նկարագրում է նաեւ Բարխուդարեանցը, երբ արդէն աւերուած էր միաբանուիների կացարանների մեծ մասը, անապատի պարսպի պատերը տեղ-տեղ վնասուած:

Անապատս շինուած է անտաշ քարով երկու կամարի վերայ, որի երկարութիւնն է 11 մետր եւ լայնութիւնն 9, (խիստ անմաքուր է):

Անապատս ունի եւ գաւիթ, որ շինուած է նոյն ոճով, երկարութիւնն 5 մետր 75 սանթիմ, լայնութիւն 8 մետր 90 սանթիմ (հարաւից հիւսիս): Ինչպէս անապատս եղած է յատուկ կուսանոց, նոյնպէս գաւիթս եղած է յատկապէս դամբարան Մելիք Շահնազարեանի իշխանական ցեղին: Գաւթումս ամփոփուած են Մանուէլ վարդապետի, Մելիք-Միրզայի, Մելիք-Յիւսէյինի, Մելիք-Յովսէփի եւ սոցա տիկնանց մարմիններն¹⁸:

ուորի սրից, կարողանում է միայն խոյս տալ՝ ժայռից իրեն ցած նետելով: Ըստ անդագրոյցի՝ աներեսոյթ ուժի զօրութեամբ նա անվնաս հասնում է ցած: Արշաանքի ժամանակ կուսանոցում պահուող կենաց փայտի մասունքով արծաթապատ խաչը գերի է տարում, որը աղանի դարձած վերադառնում է վանք ու կրկին խաչի ձեւ ստանում: (Լալայեան, էջ 43):

¹⁴ Այս դէպքերի մասին տե՛ս՝ Արտակ Մաղալեան, *Վարանդայի Մելիքութիւնը, Լեռնային Ղարաբաղի Հանրապետութիւն. անցեալը, ներկան եւ ապագան (միջազգային գիտաժողովի նիւթեր)*, Երեւանի համալսարան հրատ., Երեւան, 2007, էջ 141-42:

¹⁵ Վարչադատական գործերով թեմական-եկեղեցական մարմին Ռուսաստանում:

¹⁶ *Վաւերագրեր Հայ Եկեղեցու պատմութեան, գիրք Թ.*, «Ոսկան Երեւանցի» հրատ., Երեւան, 2001, էջ 47:

¹⁷ Զալալեանց, էջ 246-47:

¹⁸ Բարխուդարեանց, էջ 95-96:

Շուշիի Սուրբ Աստուածածնայ Կուսանաց Անապատ

Երկու դար անց՝ 1816ին, երբ արդեն լքուած ու կիսաւեր էր Աւետարանոցի անապատը, մի նոր կուսանոց է հիմնուել **Շուշիում**՝ կոյս Հռիփսիմէ Բահաթուրեանցի եւ իր եղբայրների նախաձեռնութեամբ:

1856ին Էջմիածնի սինոդին ուղղած նամակում, կուսանոցի մայրապետ Հռիփսիմէն ներկայացնում է կուսանոցի հիմնադրման պատմութիւնը.

Ի ժամանակ խանական կառավարութեան երկրին Ղարաբաղու՝ յորժամ ես՝ գոյով մէն ի մանկական հասակի՝ ցանկայի հրաժարիլ ի զբաղմանց աշխարհի, ջանայի թողլով զազգատոհման եւ մեկնիլ ի նոցանէ, գնալ յանապատ իմն հեռի եւ լցուցանել զփափագ սրտիս ի կուսակրօնութեան: Հարազատ եղբարքն իմ հանգուցեալ Իսրայէլ եւ Աստուածատուր եւ այժմ կենդանի Պետրոսն Բահադուրեանց չտալով թոյլ կամաց իմոյ աշխատեալ են շինել աստ վասն իմ զտեղի միայնակեցութեան¹⁹:

Ներկայում հիմնովին աւերուած կուսանոցի եկեղեցին Շուշիի առաջին քարաշէն եկեղեցին էր, որի դռան ճակատակալ քարին նոյնպէս Հռիփսիմէի եւ իր եղբայրների անուններն էին. «Շինեցաւ սուրբ եկեղեցիս յանուն Սուրբ Աստուածածնայ արդեամբ ձեռագործ աշխատանաց Կոյս Հռիփսիմէայ օժանդակութեամբ երից եղբարց իւրոց հարազատաց Իսրայէլի, Աստուածաբոյր եւ Պետրոսի Գրիգորեանք Բահադուրեանց ի թվն 1816 ամի»²⁰:

Բարխուդարեանցն յաւելում է. «Միեւնոյն բազմաշխար Կոյս Հռիփսիմէն շինել քուած է զանգալունը առանց օժանդակութեան այլոց»²¹:

Կուսանոցի այս եկեղեցում էլ, ինչպէս նշում է Հռիփսիմէ Բահաթուրեանցը, «ի քսանամեայ հասակի ձեռնադրեալ ի նախկին տեղական Սարգիս մեքորապօլտէն Աղուանից մնացել եմ ի միայնակեցութիւն ի նոյն սր. վանս»²²:

Շուշիի Կուսանաց Անապատը Արցախի միակ կուսանոցն է, որի մասին պահպանուած արխիւային նիւթերը բաւականաչափ տեղեկութիւններ են հաղորդում կուսանոցի գործունէութեան մասին: Այն գործել է աւելի քան 100 տարի: Կոյսերի առաւելագոյն թիւը չի գերազանցել մէկ տասնեակը: Ուշագրաւ է, որ նրանց մեծ մասը, ինչպէս Հռիփսիմէ մայրապետը, եղել են ձեռնադրուած սարկաւագուհիներ՝ մի երեւոյթ, որ բնորոշ է այս շրջանի Հայ եկեղեցու կուսանոցներին, ինչպէս Թիֆլիսի Ս. Ստեփանոս եւ Նոր Զուղայի Ս. Կատարինէ վանքերին:

¹⁹ ՀՀ Ազգայն Արխիւ (ԱԱ), ֆ. 56, ց.1, գ. 3453: Հմմտ.՝ Հեղինէ Մկրտչեան, «Շուշիի Կուսանաց Անապատը» («Շուշին՝ հայկական մշակոյթի օջախ» գիտական կոնֆերանսի զեկոյց) «Կաճառ» գիտական կենտրոնի տարեգիրք, «Կաճառ» գիտական կենտրոնի հրատ., Շուշի, 2014, էջ 205:

²⁰ Բարխուտարեանց, էջ 148:

²¹ Նոյն:

²² ՀՀ ԱԱ, ֆ. 56, ց. 1, գ. 3453:

Կուսանոցի 100ամեայ պատմութիւնն իր ողբերգական վախճանին է հասել 1920ին՝ Շուշիի հայկական թաղամասում մուսաւթականների սանձազերծած մարտեան կոտորածներից²³:

Արդէն կիսաւեր Կուսանաց Անապատն աղբրեջանցիներն հիմնայատակ աւերել են 1960-70ականներին²⁴: Կուսանոցի միակ վկաները Շուշիի հայկական հին գերեզմանոցում պահպանուած միքանի կոյսերի տապանաքարերն են, որոնց առիթ ենք ունեցել այցելելու 2012ին:

Դրամատիկ է նաեւ կուսանոցի վերջին սարկաւագուիու՝ կոյս Նունէ Սարգսեանի ճակատագիրը: «Արտաքին չարութեան, ներքին ամբարշտականութեան հետեւանքով Հայաստանի շատ գաւառների հետ միասին կործանուեց եւ գեղեցիկ Շուշին եւ նրա մէջը մեր մենաստան-անապատը»²⁵ 1925ին Գէորգ Ե. Սուրենեանց կաթողիկոսին յղած նամակում գրել է լքուած անապատի սարկաւագուիին կաթողիկոսից նպաստ կամ կացարան խնդրելով:

Յետագայում Նունէ կոյսին տեսնում ենք արդէն Բաքուի հայկական եկեղեցում: 1956ի *Էջմիածին* ամսագրից տեղեկանում ենք. «Բաքուի Ս. Գրիգոր Լուսաւորիչ եկեղեցում երկար տարիներից իվեր ապրում եւ ծառայում է Սարգսեան կոյս Նունէն: Վերջերս նա լանջախաչով պարգեւատրուեց Վեհափառ Հայրապետի կողմից: Նորին Ս. Օծութեան բարեհաճ կարգադրութեամբ կոյս Նունէն թոշակ է ստանում Մայր Աթոռից»²⁶:

²³ Ըստ աղբրեջանական աղբիւրների՝ 1920 Մարտի 22ին Շուշիում սպանուել է շուրջ 8000 հայ (*Нагорный Карабах в 1918-1923гг., Сборник документов и материалов [Լեռնային Ղարաբաղը 1918-1923ին, յօդուածների եւ նիւթերի ժողովածու]*, ՀԱԱ ԳԱ հրատ., Երեւան, 1992, էջ 416. նաեւ՝ Բակուր Կարապետեան, *Շուշի բերդաքաղաքը*, ԵՊՀ հրատ., Երեւան, 2000, էջ 278-82. նաեւ՝ Համլէտ Յարութիւնեան, «Շուշիի հայութեան կոտորածները (1919թ. Յունիս եւ 1920թ. Մարտ)», *Բանբեր հայագիտութեան*, 1:2015, էջ 58-63. նաեւ՝ Ալիկ Ղարիբեան, «Շուշիի 1920թ. կոտորածը», *Շուշին հայոց քաղաքակրթութեան օրրան (Շուշիի ազգապահպան 15-րդ տարեդարձին նուիրուած գիտաժողովի նիւթեր)*, ՀՀ ԳԱԱ «Գիտութիւն» հրատ., Երեւան, 2007, էջ 175-80:

²⁴ Շահէն Մկրտչեան, Շչորս Դալթեան, *Շուշի. ողբերգական ճակատագրի քաղաքը*, Գասպրինտ, Երեւան, 2008, էջ 112:

²⁵ Վաներագրեր Հայ եկեղեցու պատմութեան. 1921-1938թթ., կազմող Ս. Բեհրուդեան, ՀՀ կառավարութեանն առընթեր արխիւային գործի վարչութիւն, ԵՀ տպարան, Երեւան, 1994, էջ 70:

²⁶ Ն. Տէր Կարապետեան, *Աղբրեջանի թեմն այսօր, Էջմիածին*, Դեկտեմբեր, 1956, էջ 101:

Մեծ Ղարամուրադի Սուրբ Աստուածածին Կուսանաց Անապատ

Կուսանոցների վերարթնացման ԺԷ. դարի կանանց վանքերից է նաեւ պատմական **Փառիսոս**²⁷ գաւառի **Մեծ Ղարամուրատ**²⁸ բնակավայրի **Սուրբ Աստուածածին** կուսանաց անապատը:

Կուսանոցը հիմնադրուել է 1636ին, Փիլիպպոս կաթողիկոսի օրհնութեամբ ու անմիջական մասնակցութեամբ: Այդ մասին տեղեկանում ենք Նոր Զուղայում ընդօրինակուած Յայսմաւորքի յիշատակարանից: Գրչագիր այս մատեանն էլ Փիլիպպոս կաթողիկոսի ընծան է կուսանաց անապատին:

Յիշատակ է Յայսմաւորքս ի դուռն **Ղարամուրատու** կուսանաց **Սուրբ Աստուածածին**, զի ի յամի, որում թվականն էր Հայոց ՌՁԵ, սրբազան եւ երիցս երանեալ հայրապետն՝ տէր **Փիլիպպոսն** ետուր զսա ի դուռն Սուրբ ուխտիս եւ հաստատեաց զսա [եր]դմամբ գո նգովիք, թէ որչ[ա]փ այս անապատ հաստատ, ով ոք հակառակութիւն անի եւ հեռացուցանէ՝ նգովեալ լիցի ի սուրբ հայրապետաց, զի ինքն հայրն մեր՝ վերոյգրեալ սուրբ հայրապետս խնամարկեալ հիմն արկեաց եւ հաստատեաց զանապատս աղջկանց եւ նախախնամեաց սպասուք եւ ամենայն զարդուք, եւ կացոյց մայրապետ՝ **զՀռիփսիմէ** կոյսն, եւ պարկեշտ վ[ա]րուք, եւ միաբանքն եւս նոյնպէս²⁹:

Կուսանոցի առաջին մայրապետ Հռիփսիմէի անունը նշուած է նաեւ ԺԶ. դարի Շարակնոցի յիշատակարանում: Այս ձեռագիրը եւս 1636ին ընծայուել է կուսանոցին. «Յիշատակ է Շարակնոցս Ղարամուրադի աղջկանց անապատին, ի թվին ՌՁԵ, յառաջնորդութեան Հռիփսիմէ եւ իւր սրբակրօն միաբանիցն»³⁰:

²⁷ ԺԷ. գաւառը գտնուում է Լեռնային Արցախի հատուածում: Տարածում է Կուրի աջակողմեան Շամխոր վտակի, Գեղամայ լեռնաշղթայի շարունակութեան եւ Տաւուշ գետակի միջեւ (Բարխուտարեանց, էջ 24. նաեւ՝ Յակոբեան, Բախշեան, Բարսեղեան, *հյոր.* 5, ԵՀ հրատ., Երեւան, 2001, էջ 239):

²⁸ Գտնուում է Ադրբեջանի Գետաբեկի շրջանում: Հայաթափուել է ԺԸ. դարի վերջերին: Ներկայում անմարդաբնակ տարածք է (Յակոբեան, Մելիք-Բախշեան, Բարսեղեան, *հյոր.* 3, ԵՀ հրատ., Երեւան, 1991, էջ 536. նաեւ՝ *Հուսիսային Արցախ*, ՀՀ ԳԱԱ «Գիտութիւն» հրատ., Երեւան, 2004, էջ 88-89):

²⁹ *Հայերէն ձեռագրերի ԺԷ. դարի յիշատակարաններ*, *հյոր.* Բ., Հայկական ՍՍՀ ԳԱ հրատ., Երեւան, 1978, էջ 656: Հայերէն ձեռագրերի մայր ցուցակում հրապարակուած այս նոյն յիշատակարանում նշուած է ՌՁԷ. տարեթիւր՝ 1638: Ըստ նոյն ձեռագրի՝ մէկ այլ յիշատակարանի՝ Յայսմաւորքի պատուիրատու եւ ստացող Էրտամը 1638ին ձեռագիրը նուիրել է Փիլիպպոս կաթողիկոսին, որն էլ, ըստ մեզ արդէն ծանօթ յիշատակարանի, այն նուիրել է Ղարամուրատի Կուսանաց Անապատին նոյն՝ 1638ին: Հակուած ենք կարծելու, որ իրական է ՌՁԵ տարեթիւր (*Մայր ցուցակ հայերէն ձեռագրաց*, *հյոր.* Ե., «Նայիրի» հրատ., ԵՊՀ հրատ., Երեւան, 2009, էջ 39):

³⁰ *Հայերէն ձեռագրերի ԺԷ. դարի յիշատակարաններ*, *հյոր.* Բ., էջ 669:

Կուսանոցն հաւանաբար հարուստ է եղել ձեռագիր մատեաններով, որոնք մենաստանի փակուելուց յետոյ յայտնուել են այլ վայրերում: Այսպէս, Բարխուդարեանցը ԺԹ. դարի վերջերին Գարդման գաւառի Մեծ Բանանց գիւղի եկեղեցում տեսել է 1671ի գրչագիր Աւետարան, որը եւս ժամանակին նուիրաբերուել է Ղարամուրատի Կուսանաց Անապատին:

Շնորհոք եւ օժանդակութեամբ Տեառն մերոյ Յիսուսի Քրիստոսի աւարտեցաւ նոր կտակարանս.. ձեռամբ.. Մխիթարի ի թուականութեան հայկական տումարի ամի հազարերորդի, հարիւրերորդի, քսաներորդի... ի յայս ամի սաստիկ մահ յերկիրս Վերին Զակամայ, որ օր մի 'ի տան միում եօթն հոգի վախճանեցաւ... ի հայրապետութեան տեառն Պետրոսի Սրբազան Կաթողիկոսին Սրբոյ Գանձասարայ, ի առաջնորդութեան նահանգիս Մինաս վարդապետի եւ ի տէրութեան Պարսից Շահ Սուլէիմանին ի յերկիրս Վերին Զակամայ 'ի գեօղս որ կոչի Սուլտանեցիք ընդ հովանեաւ սուրբ Աստուածածնիս ի խնդրոյ բարեմիտ Եային եւ այրն (առն) իւրոյ Ոսկանին...: Արդ ես Եայս ստացայ զայս աւետարանս եւ ետու վախմ ի դուռն Ղարամուրատ Կուսանաց անապատի Սուրբ Աստուածածնի³¹:

Ղարամուրատի կուսանոցը գործել է առնուազն մինչեւ 1701. դրա վկայութիւնն է եկեղեցու դռան վրայի արձանագրութիւնը.

Շնորհիւ Աստուծոյ եւ Ովանէս վարդապետս, որդի ապաշխարողի շինեցի զեկեղեցիս (անապատ կուսանաց) արդեամբ գոլիք (գոյիք) ամենայն քրիստոնէից՝ յիշատակ ինձ եւ ծնողաց իմոց եւ ամենայն աշխատողաց 'ի մայրապետութեան անապատիս Թագուհոյն եւ Կայինային 'ի ՌՃԾ. թվ.³²:

Ե՞րբ եւ ի՞նչ հանգամանքներում է փակուել կուսանոցը՝ յայտնի չէ: Կարելի է ենթադրել միայն, որ այն դադարել է գործել մինչ Մեծ Ղարամուրատի հայաթափումը, որ տեղի է ունեցել 1770ականներին: Նման ենթադրութեան առիթ է տալիս այն, որ կուսանոցում պահուող ձեռագրերը ԺԸ. դարի երկրորդ տասնամեակի վերջերին այլեւս այլոց ձեռքին էին:

Այսպէս, Փիլիպպոս կաթողիկոսի նուիրաբերած Յայսմաւորքի վերջին ստացողը «*աստուածայսէր, ողորմած եւ բարէբաշդ՝ Վարդանն*»³³ է, որ 1733ին նորոգել է այն: Կուսանոցի վերոյիշեալ Աւետարանը եւս 1729ին այլ անձի ձեռքում էր. «*Զվերջին սրացող զսուրբ աւետարանս... Մէլիք Սարգիս եւ ծնողացն հայրն իմոյ Ովանէսն... թվին ՌՃՀԸ*»:

³¹ Բարխուտարեանց, էջ 282. նաեւ՝ Մինասեան, էջ 69:

³² Բարխուտարեանց, էջ 309. նաեւ՝ Ե. Լալայեան, «Գանձակի գաւառ», *Ազգագրական հանդէս, գիրք Ե.*, 1899, Թիֆլիս, էջ 326-27: Արձանագրութիւնը 1960ականներին արդէն ոչնչացուած էր (*Դիւան հայ վիմագրութեան. Արցախ*, էջ 273):

³³ *Մայր ցուցակ հայերէն ձեռագրաց, հիւր. Ե.*, էջ 40:

Տող կամ Դող աւանի Կուսանաց Անապատ

Պատմական **Դիզակ**³⁴ գաւառի **Տող կամ Դող** աւանի կուսանոցի հիմնադրման ժամանակի մասին աղբիւրները լուռ են: Նշենք, սակայն, որ կուսանոցի մասին մեզ հասած տեղեկութիւններում յիշատակում են Դիզակի մելիքների անուններ, որից հաւանական է դառնում, որ այս կուսանոցը եւս ժէ. դարի է:

*«Յաջ կողմն այսր գեղջ է սագաշէն եկեղեցի եւ անապատ կուսանաց, շուրջ զորով գրանին գերեզմանք պատուելի արանց»*³⁵, այսպէս է նկարագրում Զալալեանցը Տողի կուսանոցը:

Կուսանոցի մասին պահպանուել է նաեւ աւանդագրոյց, ըստ որի իշխանագուն մի այր հարկադրաբար կրօնափոխ է եղել՝ ընդունելով մահմետականութիւն: Ապա զոչալով ապաշխարել է եւ *«ի նշան ճշմարիտ ջերմեռանդութեան կառոյց զեկեղեցին սուրբ Սրբեփանոսի եւ զանապատն Կուսանաց»*³⁶:

Բարխուդարեանցն առաւել մանրամասն է ներկայացնում անապատը. Հանգստարանիս վերեւի ծայրում կայ մի այլ քարուկիր եկեղեցի եւս, կառուցեալ մի կամարի վերայ, որի ճակատի խաչի վերայ փորագրուած է. «Խաչս Վարդան»: Եկեղեցուս մէջ է Մէլիք-Բախտամի գերեզմանն, որ ծածկուած է հողով: Եկեղեցուս մօտ նշմարուում են խուցերի եւ կացարանների բակեր եւ բէկորներ, որոց մասին պատմում են թէ կուսանոց եղած է անապատս³⁷:

Ժողովրդական զրոյցների իսկութիւնը հաստատում է գիւղի Ս. Յովհաննէս եկեղեցում պահուող խաչածէւ արծաթեայ մասնատուփի վրայի արձանագրութիւնը. *«Յիշատակ է Մէլիք Եսայի (ու) որդի Սափարի բէկին, որ ետ Դողա կուսանաց Անապատին. սա է Յակովբ հայրապետին եւ Թէոդորոսի մատունք...»*³⁸:

Ոսկանապատի Սուրբ Աստուածածին Կուսանաց Անապատ

Արցախում ժէ. դարի եւս մէկ կուսանոց է **Գարդման**³⁹ գաւառի **Ոսկանապատ**⁴⁰ բնակավայրի **Սուրբ Աստուածածին** կուսանաց անապատը,

³⁴ ԺԱ. գաւառն է Հադրութի եւ Դիզափայտի լեռնաշղթայի միջեւ: Յիշատակում է նաեւ Պազկանք անուամբ (Բարխուտարեանց, էջ 23. նաեւ՝ Յակոբեան, Մելիք-Բախշեան, Բարսեղեան, *հղր.* 2, ԵՀ հրատ., Երեւան, 1988, էջ 107):

³⁵ Զալալեանց, էջ 259:

³⁶ Նոյն:

³⁷ Բարխուտարեանց, էջ 77:

³⁸ Նոյն, էջ 74:

³⁹ ԺՁ. գաւառն է, որ յետագայում ստացել է Գանձակ անուանումը: Ընկած էր Կուրակ եւ Շամքոր գետակների, դաշտաբերանի եւ Մուսեան լեռնաշղթայի գագաթնագծի շարունակութեան մէջ (Բարխուտարեանց, էջ 24):

ըստ ամանդութեան՝ հիմնուած ոմն մելիք Ոսկանի⁴¹ կողմից, որից եւ Ոսկանապատ անունը:

Բարխուդարեանցի նկարագրութեամբ՝ եկեղեցին գիւղի վերին ծայրում էր, Ոսկանապատ գետի ձախ ափին: Եկեղեցու հարաւային պատի մօտ Յարութին պապի 1821ի տապանաքարն էր. «Այս է տապան Յարութին պապին, որ վերստին նորոգեաց սուրբ եկեղեցիս թվ. ՌՄՀ.»⁴²:

Բարխուդարեանցը **Սուրբ Աստուածածինը** աւելի նմանեցնում է եկեղեցու, քան՝ վանքի.

Ունի եկեղեցու ձեւ եւ ոչ վանքի, սակայն ունեցած է միաբանից խուցեր տաճարս իւր արեւմտեան կողմում, որպէս վկայում են տեսողք. բայց յորդ անձրեւի հեղեղներն քանդած եւ տարած են սոյն սենեակները եւ կոյտ կոյտ խիճեր դիզած խուցերի տեղերում⁴³:

Սուրբ Աստուածածնի կուսանոց լինելու հանգամանքը կրկին հաստատում են ձեռագիր յիշատակարանները: 1679ին ընդօրինակուած Աւետարանը⁴⁴ ԺԹ. դարի վերջին պահուել է Ղազախի Սեւքար գիւղի եկեղեցում, որտեղ եւ ձեռագրի երկու յիշատակարան օրինակել ու մեզ է փոխանցել տեղագիրը:

Յիշատակարաններից մէկում նշում են գրչի եւ պատուիրատուների անունները: Վերջիններս, լինելով անզաւակ ամուսիններ, Աւետարանը նուիրել են կուսանաց անապատին:

Ի խնդրոյ բարեմիտ եւ մեծահաւատ եւ իշխանագուն պարոն Միրումին, որ է որդի Սարուխան-Պէկին, թողն մեծ Միրումանին: Հի ահա այս Միրում-պէկս, ոչ ունելով որդի մարմնատր, վասնորոյ, կողակից Միրում-պէկին, Խաթուն աղէն, եռափափագ սիրով եւ ջերմեռանդ սրտիւ, կատարեալ յուսով եւ լիակատար հաւատով: Ըստացաւ սուրբ աւետարանս որդի անմահ եւ յիշատակ յաւիտենական, եւ պաշար հոգոյ իւրոյ ի անդարձ ճանապարհին, որ տանի առ Քրիստոս յոյսն ամենեցուն: Ունելով ի մտի զքանն եւ զհրամանն տեառն մերոյ եւ փրկչին Յիսուսի Քրիստոսի, որ ասէ. երանի որ ունիցի զաւակ ի Սիոն, եւ ընտանի Ե-

⁴⁰ Գիւղը ներկայում յայտնի է Ջոռնաբաղ անուամբ: Գտնւում է 1988-91ին ամբողջովին հայաթափուած, Ադրբեջանի Խանլարի շրջանում (Յակոբեան, Մելիք-Բախշեան, Բարսեղեան, *հտր.* 4, ԵՀ հրատ., Երեւան, 1998, էջ 173. նաեւ՝ *Հիսիսային Արցախ*, էջ 303):

⁴¹ Նման անձի իսկութիւնը պատմութիւնը չի հաստատում (*Արծազանք*, 1886, թիւ 20, Թիֆլիս, էջ 294. նաեւ՝ *Հիսիսային Արցախ*, էջ 407):

⁴² Բարխուդարեանց, էջ 275:

⁴³ Նոյն, էջ 275:

⁴⁴ Մինասեանը գրչութեան ժամանակ է նշում 1669ը, որը չի համապատասխանում մեզ յայտնի յիշատակարանում նշուած թուականին. «Արդ՝ գրեցաւ սուրբ եւ Աստուածաշունչ աւետարանս, ի թուականիս հայոց ՌՃԻԸ. Ամին» («Ճանապարհորդական յիշատակարան», *Արծազանք*, 1886, թիւ 20, Թիֆլիս, էջ 294. նաեւ՝ Մինասեան, էջ 77):

րուսաղէմ, եւ դարձեալ եթէ գանձեցէք ձեզ գանձս յերկինս, ուր ոչ գող մերձեւնայ եւ ոչ ցեց ապականէ. սակս որոյ ըստացաւ զսուրբ ւեւտարանս, ի հալալ արդեանց եւ ի արդար վաստակոց իւրոց, բարեսէր կինն Խաթուն աղէն ետ ի դուռն սուրբ անապատիս, ոսկանա...տու, որ է մ....տան կու... յաղագս առիթ յիշման հոգոյ իւրոյ, եւ ծնողացն, հօր իւրոյ, խոցատեղին եւ մօրն իւրոյ Գաւիարին, եւ եղբարցն Աստուածատրին եւ Սարգսին, որք ի Քրիստոսէն հանգուցել: Իսկ ով ոք եթէ, իւրոց կամ օտարաց հանել կամիցի Ոսկանապատու, եւ ի դրանէ սուրբ անապատիս, կամ գրաւ դնելով, կամ վաճառելով պարտակա... ի առաջի ահեղ ատենին Քրիստոսի...⁴⁵:

Յաջորդ յիշատակարանից յայտնի է դառնում, որ ինչ-ինչ պատճառներով ձեռագիրը յայտնուել է «անօրինաց» ձեռքին եւ կրկին վերադարձուել կուսանոցին 1684ին:

Եւ արդ ես Սարգսի որդի, Խօջա Պատիս, առի զսուրբ ւեւտարանս ի ձեռաց անօրինաց. եւ ետու վախմ ի դուռն Ոսկանապատու կուսանաց անապատին, Աստուածածին սուրբ տաճարին, մի ոք իշխեսցէ հանել անտի, քանզի բնական այլ ու այնմ անապատին անուան էր գրեալ եւ տվեալ բայց յետ ժամանակաւ ի յարկածից չարին կողակսն հատեալ էին եւ մեք եւս տվաք յիշատակ թուականիս Հայոց, ՌՃԼԳ⁴⁶:

1980ականներին՝ մինչ գիւղի հայաթափումը, Սամուէլ Կարապետեանին յաջողուել է լուսանկարել դեռեւս կիսաւեր Կուսանաց Անապատի եկեղեցին եւ չափագրել այն⁴⁷: Կարապետեանի դիտարկմամբ՝ եկեղեցին իր յօրինուածքով ԺԷ. դարի է, որ հաստատում է Կուսանաց Անապատի՝ նոյն ԺԷ. դարի պատկանելիութիւնը:

Այլ Կուսանաց Անապատներ ըստ աւանդագրոյցների

Պատմական Գարդմանը, թերեւս, հարուստ է եղել կուսանոցներով: **Գարդմանի Գետաշէն**⁴⁸ աւանի արեւմտեան մասում գտնուող փոքր եկեղեցին, ըստ աւանդագրոյցների, եւս կուսանոց էր: Այն հաստատում է 1885ի եկեղեցական մի վաւերագիր, որտեղ այս եկեղեցին յիշատակուած է «Կուսանոց Սբ. Տիրամօր եկեղեցի» անունով⁴⁹:

⁴⁵ «Ճանապարհորդական յիշատակարան», էջ 294. նաեւ՝ հայր Համազասպ Ոսկեան, *Արցախի վանքերը*, Վիեննա, Մխիթարեան տպարան, 1953, էջ 141:

⁴⁶ «Ճանապարհորդական յիշատակարան», էջ 294:

⁴⁷ *Հիսիսային Արցախ*, էջ 415-417:

⁴⁸ Գտնում է Աղբթեանի Հանրապետության Խանլարի շրջանում: Ամբողջովին հայաթափուել է 1991ին:

⁴⁹ *Հիսիսային Արցախ*, էջ 340:

Բարխուդարեանցը եկեղեցու շինութեան թուական է համարում 1749ը՝ ներկայացնելով մուտքի խոյակի վրայ արուած արձանագրութիւնը. «Թվ. ՌՃՂԸ.»⁵⁰:

«Հաստատում են թէ Կուսանոց եղած է այս, երկար ժամանակ նստած են այստեղ կուսանք, որոց մէջ եղած է եւ մի կոյս Մելիք-Բէկլարեանների տոհմից, որի պարճառաւ Մելիք-Թամրագին որդին նորոգել տուած է անապատ»⁵¹ գրում է Բարխուդարեանցը, նշելով նաեւ որ եկեղեցու շուրջ դեռ պահպանուած են միքանի խցեր:

Մինչ Գետաշէնի հայաթափումը, Կուսանաց Անապատի այս եկեղեցին եւս դեռեւս կիսաւեր վիճակում էր, որի յատկագիծը եւ միքանի լուսանկարներ հրապարարակել է Կարապետեանը⁵²:

Ըստ աւանդագրոյցների, կուսանաց անապատ էր նաեւ **Ջրաբերդ**⁵³ գաւառի **Ղարաբուլաղ**⁵⁴ գիւղին կից եկեղեցին:

«Գիւղին կից կայ մի եկեղեցի, որ գիւղացիք անուանում են «Կուսանաց անապատ»: Եկեղեցու վրայ արձանագրութիւն չկայ, բայց կիսականգուն են երկու միաբանութեան խուցերը»⁵⁵ գրում է Նոր-դարի թղթակիցն այս եկեղեցու մասին:

Կարապետեանի հաղորդմամբ՝ 1980ին Կուսանաց Անապատի միաբանական խցերն հիմնովին ւերուած էին: Պահպանուած էին միայն եկեղեցու խորանին ու հիւսիսային ճակատին յարող հատուածները⁵⁶: Ըստ Կարապետեանի այս եկեղեցու շինարուեստը եւս բնորոշ է ԺՁ.-ԺԷ. դարերին:

Պատմական Արցախի կուսանոցների շարքն այսքանով չի լրանում: Արցախի կուսանոցների մասին յայտնի են այլ աւանդագրոյցներ, որոնց արժանահաւատութիւնը երբեմն կարող է եւ կասկածի տեղիք տալ:

⁵⁰ Բարխուդարեանց, էջ 264:

⁵¹ Նոյն, էջ 265. նաեւ՝ Լալայեան, «Գանձակի գաւառ», էջ 319:

⁵² Հիւսիսային Արցախ, էջ 342-43:

⁵³ ԺԵ. գաւառը՝ Մուս լեռնաշղթայի, դաշտաբերանի, Թարթառ եւ Կուրակ գետերի սահմաններում (Բարխուդարեանց, էջ 24):

⁵⁴ Այս անունով յայտնի են մի շարք բնակավայրեր: Նշուած գիւղը գտնուած է Ադրբեջանի Խանլարի շրջանում: Խորհրդային տարիներին վերանուանուել է Մարտունաշէն (Յակոբեան, Մելիք-Բախշեան, Բարսեղեան, *հտր.* 3, էջ 524):

⁵⁵ Գ. Աշոտեան, «Թղթակցութիւն», *Նոր-դար*, 1894, թիւ 73, էջ 3: Հմմտ.՝ Հիւսիսային Արցախ, էջ 385:

⁵⁶ Հիւսիսային Արցախ, էջ 386:

Այսպէս, ամանդագրոյցի համաձայն՝ կուսանաց անապատ է եղել նաեւ **Փառիսոս** գաւառի **Ծաղկոց Անապատը՝ Գառնակեր**⁵⁷ գիւղի հարաւային կողմում:

«Քարաշէն, թաղակապ փոքրիկ եկեղեցի. ունի մի գաւիթ, ուր կան երկու անյայտ գերեզմաններ, որոնց Գառնակերցիք պատում են իբրեւ սրբեր: Նրանց ասելով՝ այս տաճարն եղել է կուսանաց անապատ եւ Ծաղիկ մայրապետի անունով կոչուել է Ծաղկոցայ: Բայց եթէ արդարեւ կուսանաց մենաստան եղած լինի այս, Ծաղիկ անունից Ծաղկոցայ կոչուել չէր կարող. գուցէ Ծաղկանոցի կրճատումն է Ծաղկոցը»⁵⁸ ընդգծուած երկմտութեամբ գրում է տեղագիրը:

Որքանով են իրական այս գրոյցները՝ դժուար է ասել: Սակայն յայտնի է նաեւ, որ Հայ եկեղեցում կուսանոցներն յաճախ գործել են նշանաւոր վանքերի հովանո ներքոյ, եւ չպէտք է բացառել, որ մոռացուած նման կուսանոցների մասին յիշողութիւնը կարող էր սերնդէսերունդ փոխանցուել սոսկ ամանդագրոյցի միջոցով:

Այսպէս՝ խոշոր վանքերի հովանո ներքոյ մեզ անյայտ մի կուսանոցի գոյութեան մասին է յուշում պատմական Ծարում⁵⁹ 1684ին Վառվառէ գրչուհու ընդօրինակած ձեռագրի յիշատակարանը.

Գրեցաւ ի յերկիրս Ծար՝ Փոքր Սիւնիս կոչեցելոյ, ի սուրբ վանս կուսանաց, ընդ հովանեաւ Դադէի Սուրբ Առաքելոյն եւ Սուրբ Կաթողիկէին եւ Սուրբ Աստուածածին եւ ամենագոր Սուրբ Նշանին Մարդադաւնեաց եւ այլ սրբոց, որ անդ կան գումարեալ ձեռամբ ամենավեպ եւ թշուառ անձին Վառվառիա միայնաւորի⁶⁰:

Մեր ժամանակներում համացանցում եւ ճամփորդական ուղեցոյցներում իբրեւ կուսանաց անապատ է նշում նաեւ Դադիվանքից ոչ-հեռու ԺԲ.-ԺԷ. դարերի Ս. Աստուածածին վանքը⁶¹: Աղբիւրագիտական որեւէ

⁵⁷ Գտնուում է Ադրբեջանի Շամխորի շրջանում (Յակոբեան, Մելիք-Բախշեան, Բարսեղեան, *հյր. 1*, ԵՀ հրատ., Երեւան, 1986, էջ 771. նաեւ՝ *Հիսիսային Արցախ*, էջ 476):

⁵⁸ «Ճանապարհորդական յիշատակարան», *Արծազանք*, 1886, թիւ 21, էջ 308: Հմմտ.՝ Ոսկեան, էջ 161. նաեւ՝ *Հիսիսային Արցախ*, էջ 480:

⁵⁹ Ներկայում՝ Ադրբեջանի վերահսկողութեան ներքոյ է: Ծարի հայկական սրբավայրերի մեծ մասը ադրբեջանցիները ոչնչացրել են խորհրդային տարիներին՝ խաչքարերը, տապանաքարերն օգտագործելով իբրեւ շինանիւթ (Սամուէլ Կարապետեան, *Հայ մշակոյթի յուշարձանները հորհրդային Ադրբեջանի բռնակցուած շրջաններում*, ՀՀ ԳԱԱ «Գիտութիւն» հրատ., Երեւան, 1999, էջ 56):

⁶⁰ *Մայր ցուցակ հայերէն ձեռագրաց, հյր. 2.*, «Նայիրի» հրատ., Երեւան, 2012, էջ 1323:

⁶¹ Կարապետեան, *Հայ մշակոյթի յուշարձանները հորհրդային*, էջ 76-81: Կարապետեանը ուսումնասիրութիւններ է կատարել այս վանքում 1990ականներին, Քարվաճառի ազատագրումից յետոյ: Ներկայում այն կրկին ադրբեջանա-

տուեալ այս մասին՝ մեզ յայտնի չէ, թեեւ չի բացառում, որ վանական այս համալիրի ներքոյ գործել է եւս մէկ Կուսանաց անապատ:

Եզրափակելով կարող ենք արձանագրել, որ Հայ Եկեղեցու ոչ-մեծաթիւ կուսանոցների շարքում Արցախի կուսանաց անապատները նշանակալի տեղ են զբաղեցնում: Դրանք հիմնականում ԺԷ. դարի կուսանաց անապատներ են: Մեզ յայտնի աղբիւրները, սակայն, հիմնականում արձանագրում են կուսանաց վանքերի, միանձնուհիների ու մայրապետերի անուններ՝ անպատասխան թողնելով այդ վանքերի կրօնա-եկեղեցական գործունէութեանը վերաբերող հարցեր:

Հիմնովին աւերուած կամ կիսաւեր այդ վանքերն անհերքելիօրէն Արցախի հոգեւոր-մշակութային ժառանգութեան մաս են կազմում: Ներկայում դրանք ամբողջութեամբ Ադրբեջանի վերահսկողութեան ներքոյ են, եւ յայտնի չէ դրանց յետագայ ճակատագիրը:

THE NUNNERIES OF ARTSAKH

(Summary)

HEGHINE MKERTCHYAN (heghmk@yahoo.com)

Despite the small number of nunneries in the Armenian Church, there have been about ten nunneries in different provinces of historical Artsakh. They date back to the 17th century, when such convents faced a period of revival. Similar convents whose dates preceded and followed this are less well documented.

These nunneries of Artsakh were not only convents, but also cultural centers, where manuscripts were copied and illustrated. One such manuscript is the famous Gospel Manuscript at a nunnery in the historical province of Varanda, which dates back to the 17th century.

The nunneries of Artsakh undeniably constitute an important part of the spiritual and cultural heritage of Artsakh. However, currently they are either completely or partly destroyed and are controlled by the Azeris, which makes their future unclear.

Կան իշխանութեան ներքոյ է (Հայ մշակոյթի յուշարձանները Խորհրդային Ադրբեջանի, էջ 76-81):